

## DOMINGU XXVII TEMPU KOMÚN – TINAN A

### Tema

Liturjia Domingu XXVII Tempu Komún nian utiliza imajen “Maromak nia to’os-uvass” atu ko’alia kona-ba Povu ne’ebé aseita dezafiu Maromak nia domin nian no serví Nia. Husi Povu ne’e, Maromak ezije fuan/produtu sira domin nian, justisa nian, bondade nian no mizerikórdia nian.

Iha *leitura dahuluk*, profeta Isaías haktuir Maromak nia domin no atensaun ba ninia “to’os-uvass”. Maibé domin ne’e labele tau nu’udar ekivalénsia fuan egoizmu nian no injustisa nian... Povu Jahwéh nian tenke husik nia an nakfilak ho Maromak nia domin ne’ebé fiél nafatin no prodús fuan di’ak sira ne’ebé Maromak apresia – justiza, direitu, respetu ba ukun-fuan sira, fidelidade ba Aliansa.

Iha *Evanjellu*, Jezús foti fali imajen/ilas “to’os-uvass nian”. Nia kritika maka’as líder judaiku sira ne’ebé sai tiha na’in ba “Maromak nia to’os-uvass” hodi buka benefísiu ba an rasik no rekuza nafatin atu oferese ba Maromak uvass-fuan sira ne’ebé pertense ba Nia. Jezús fó sai katak sei hasai tiha “to’os-uvass” husi sira no sei entrega ba traballadór sira ne’ebé prodús no entrega fuan sira ne’ebé Maromak hein ba Nia.

Iha *leitura daruak*, Paulo ezorta sarani sira sidade grega Filipos nian – no ema hotu ne’ebé halo parte ba “Maromak nia to’os-uvass” – atu moris iha ksolok no hakmatek, hodi respeita buat ne’ebé loos, aas, justu no dignu. Ne’e mak fuan sira Maromak hein husi Ninia “to’os-uvass”.

### LEITURA I – Is 5,1-7

Isaías, Amós nia oan, ezerse nia ministériu profétiku iha Jerusalém, iha reinu Judá nian, durante metade daruak sék. VIII mK. Ninia pregasaun halo iha tempu naruk no durante liurai barak nia ukun.

Isaías – hanesan profeta sira seluk – iha ninia pregasaun, refere ba akontesimentu konkretu sira no kona realidade moris nian, problema sira, laran-susar sira, esperansa sira ema sira ninia tempu nian. Tanba ne’e, atu komprende ninia mensajen ita tenke situa nia iha época no realidade istórika ne’ebé profeta moris bá no Maromak bolu nia atu ko’alia bá.

Faze dahuluk Isaías nia ministériu hala’o iha Jotam nia ukun (740-734 mK). Ne’e mak tempu ida, bele dehan iha hakmatek polítiku, iha ne’ebé Judá mantein nia an dook husi sena internasionál no jogada política super-poténsia sira-nian.

Maski nune’e, profeta nia matan kítiku detekta realidade ida oinseluk. Internamente, sosiedade Judá marka ho injustisa boboot no arbitrariedade sira... Ema kbiit-na’in sira esplora ema fraku liu, juiz sira korruptu, rai-na’in boboot sira kaan no inventa eskema legál atu foti ema kiak sira nia soin, governante sira hanehan ema iha sira-nia okos, señora boot sira Jerusalém nian moris iha luxu no futilidade eh iha buat folin-laek nia laran, iha respetu-laek absolutu ba ema kiak sira nia nesesidade no moris-mukit.

Husi pontudevista relijiozu, kultu buras ho prátika piedade barak no manifestasaun relijioza naresin no solene; maibé buat sira ne’e hotu inkoerente no bosok-teen, basá la mai husi adezaun loos ba Jahwéh, maibé husi tentativa ida atu halo hakmatek konxiénsia sira no “sosa” Maromak.

Ba profeta, Jerusalém husik atu sai feen fiél, atu nakfilak an ba prostituta ida (kf. Is 1,21-26);

eh, dehan ho forma seluk, “to’os-uvass” ne’ebé Maromak tau matan prodús de’it fuan moruk no la’ós fuan di’ak (justiza no domin nian).

Isaías nia mensajen iha período ne’e ita hetan iha kapitulu 1-5 ninia livru nian. Testu ohin nian mak testu emblemátiku liu período ne’e nian.

“Knananuk to’os-uvass nian” karik, foun, “knananuk ida ku’u uvass nian” eh “knananuk serbisu nian”, ne’ebé poeta populár ida entoa iha ninia belun sira nia oin eh maluk sira serbisu nian. Maibé, hanesan dalabarak akontese ho forma sira espresan kultura populár nian, lalais de’it liafuan sira manán sentidu maruak (duplo) no hatudu fali realidade seluk.

Iha kultura judaika, “to’os-uvass” mak símbolu ida domin nian (kf. Cant 1,6.14; 2,15; 8,12).

“Knananuk to’os-uvass nian” sai fali iha poeta populár nia ibun, “knananuk domin nian”, ne’ebé hatudu esforsu foin-sa’e apaixonadu ida atu konkista ninia doben.

Isaías utiliza “knananuk domin nian” ne’e nu’udar rekursu atu tranzmite mensajen ne’ebé Maromak konfia ba nia.

## *MENSAJEN*

Knananuk ne’ebé profeta hananu furak no nia iha tema signifikativu. Profeta/poeta halimar ho sonoridade/melodia no ritmu, alterna liafuan midar knananuk domin nian ho liafuan toos knananuk serbisu nian. Profeta nia interlokutór sira atensaun no rona ho ksolok poeta nia tentativa (kuaze sentimentál) sira atu konkista nia doben. Sira rona nia ko’alia kona-ba serbisu atu harii nia to’os-uvass, nia kuidadu sira, nia iluzaun sira, nia mehi sira; sira hamnasa nonook bainhira temi liafuan “fatin sama-uvass uvass nian” (fatin atu halo tua domin nian) no torre (iha-ne’ebé foin-sa’e apaixonadu halo guarda, atu ema ida la tama iha ninia “to’os-uvass no ku’u fuan sira nia domin nian). Sira aprova bainhira nia, depoizde kuidadu barak, hein “fuan midar liu” husi domin ne’ebé nia kuda. Sira nia laran hirus bainhira ho kolen hotu husi foin-sa’e ne’ebé hadomi ne’e, “to’os-uvass” oferese de’it fuan siin. Auditóriu simpatiza ho poeta, identifika an ho nia, partilla ninia deziluzau...

Derepente, poeta transforma knananuk iha lia-kesar no reklama justisa. Nia interpela diretamente ninia interlokutór sira no ezije husi sira resposta ida. Públiku iha ninia liman laran: hotu-hotu konkorda katak profeta/poeta iha razaun no iha direitu tomak atu sobu vedasaun/lutu ne’ebé proteje to’os-uvass, atu la tau matan ona ba nia, atu fó orden ba kalohan sira atu la halo sai fekunda nia ho udan...

Bainhira públiku mentalmente fó ona opiniaun favoravel ba profeta/poeta, nia lansa akuzasaun ne’ebé nia prepara ona ba sira nia oin: “Na’i lalehan ho rai nia to’os-uvass mak uma-kain Israel nian no ema sira Judá nian mak plantasaun ne’ebé Na’i hili. Nia hein moris loos, maibé iha de’it fakar raan; Nia hein justisa maibé iha de’it hakilar orror nian” (vers. 7).

Ilas “to’os-uvass” nian aplika ba Maromak nia Povu ita hetan beibeik iha Bíblia (kf. Is 3,14; 27,2-5; Jer 2,21; 12,10; Ez 17,6; Os 10,1; Sal 80,9-17). Profeta no katekista sira Israel nian haree iha ilas ne’e, símbolu di’ak liu atu espresa istória domin nian ne’ebé Maromak hakarak hakerek ho nia Povu, katak, Aliansa.

Iha “aikanoik” ne’e, Maromak mak “serbisu-na’in to’os-uvass nian” no Israel mak “to’os-uvass”. Maromak mak lori husi dook (Ejitu), ai-uvass ne’ebé nia hili, hodi kuda iha rai-bokur (rai Canaan), hasai husi rai ne’e fatuk sira (povu seluk ne’ebé hela iha ne’ebá) ne’ebé bele difikulta “to’os-uvass” nia fekundidade, tau matan no liuliu, hadomi Ninia “to’os-uvass”.

Oinsá mak Israel hatán ba Maromak nia esforsu sira? Fuan sá de’it mak Jahwéh nia “to’os-uvass” prodús? Profeta/poeta hatán: Maromak hein Israel moris iha direitu/dalan loos no justisa (“mishpat” no “zedaq”) hodi kumpre fielmente ezijénsia sira Aliansa nian; Nia hein moris ida koerénsia nian ho ukun-fuan sira; Nia hein Israel respeita ema fraku sira nia direitu... Iha realidade, Povu halo kontráriu ho buat hotu Maromak hein husi nia: ema kbiit-na’in sira komete injustisa no arbitrariedade, juíz sira korruptu no la halo justisa ba kiak sira,

emboot sira pratika violénsia no fakar ema inosente nia raan, oan-kiak sira no feto-faluk sira haree ema sama rahun sira-nia direitu no laiha ema ida defende sira.

Profeta haktuir katak, Maromak labele halo paktu ho eskema ne'e no prepara An atu husik Ninia "to'os-uvas" ingrata, doben infiel.

Atensaun ba "lisaun" fundamentál: Maromak nia domin pretende kria iha nia Povu nia laran dinámika ida ne'ebé lori ba domin ba maluk sira. Maromak hadomi ita, hakarak ita husik nia domin nakfilak ita no ita hadomi ema seluk.

## **LEITURA II – Filip 4,6-9**

Ita kontinua lee surat Paulo haruka ba sarani sira iha Filipos. Bainhira nia hakerek ba nia belun sira husi Filipos, Paulo iha hela kadeia (Éfeso?), la hatene nia futuru oinsá loos. Iha dadur, nia simu tulun husi sarani Filipos nian (osan no Epafrodito nia vizita, membru ida komunidadade nian, ne'ebé sarani sira Filipos nian fó kanaar atu tau matan ba Paulo no haree ninia nesesidade sira) no sente haksolok ho sira-nia preokupasaun ba nia.

Surat ba sarani sira Filipos nian mak, liuliu, surat ida diriye ba belun sira ne'ebé Paulo hadomi, no nia hatudu ninia apresiasaun ba komunidadade ne'ebé hadomi nia, tulun nia no preokupa ho nia. Hodi haruka fila Epafrodito – ne'ebé sai moras todan– Paulo agradese, fó notísia, informa komunidadade kona-ba ninia sorte no ezorta sia ba fidelidade ba Evanjellu.

Testu ne'ebé ohin propoin mai ita pertense ba parte finál surat nian. Nia fó rekomendasaun lubuk ida, atu fó hanoin ba Filipos nia oan sira obrigasaun ruma mai husi kompromisu ho Kristu no Evanjellu.

### *MENSAJEN*

Versíkulu rua ita-nia testu nian (vers. 6-7) halo parte pasajen naruk ida, iha ne'ebé Paulo hameno sarani Filipos nian atu moris iha ksolok (vers. 4-7). "Ksolok" ne'e mak rezultadu husi moris komuñau ho Na'i (la'ós hamnasa hahaek eh otimizmu inkonxiente), ho fiar katak ita ita garantia moris loos no rohan-laek. Ema sarani moris iha ksolok, basá komuñau ho Kristu garante ba nia asesu ba moris definitiva (Na'i besik ona"). Husi ne'e mai hakmatek, dame, serenidade, ne'ebé halo fiar-na'in enfrenta moris laho ta'uk no sente seguru iha Aman Maromak nia liman domin nian (vers. 6a). Presiza de'it haburas komuñau ho Maromak, hodi entrega an ba Nia ho "orasaun sira, hamulak sira no agradesimentu" (vers. 6b).

Hafoin (vers. 8), Paulo hameno ba Filipos nia oan sira "kualidade" neen ne'ebé sira tenke kultiva no apresia: lialoos, nobreza, pureza, amabilidade no naran di'ak. Buat sira-ne'e hotu mak virtude ne'ebé merese hahi. Ema ruma haree iha versíkulu ne'e "*magna carta* umanizmu kristaun nian". Valór sira-ne'e la'ós eskuzivu sarani nian, maibé sai mós ideál pagaun (ideál mundu gregu nian). Maski nune'e, komunidadade sarani tenke nakloke ba valór umanu hotu ne'ebé loos. Sarani sira tenke sai manu-ain no sasin ba valór umanu loos.

Ikusnian, Paulo konvida Filipos oan sira atu tau iha prátika rekomendasaun sira-ne'e tuir ezemplu sira simu husi Paulo rasik (vers. 9). Sarani ida tenke moris valór umanu sira iha konfrontu konstante ho Evanjellu no iha fidelidade ba Evanjellu.

## **EVANJELLU – Mt 21,33-43**

Ita iha Jerusalém, liutiha tempu uitoan Jezús nia entrada triunfál iha sidade (kf. Mt 21,1-11). Tensaun entre Jezús no nia adversáriu sira aumenta ba beibeik. Jezús konxiente kona-ba destinu ne'ebé hein nia, maibé enfrenta diriye sira no kondena maka'as sira-nia rekuza atu

simu Reinu.

Testu ohin nian halo parte ba bloku ida ho aikanoik tolu (kf. Mt 21,28-32. 33-43; 22,1-14), ho objetivu atu ilustra rekuza Israel nian ba Maromak nia salvasaun. Lihusi aikanoik sira-ne'e, Jezús konvida opozitór sira – líder relijiozu judaiku sira – atu rekoñese sira-nia taka-an iha eskema autosufisiénsia nian, orgullu nian, arrogánsia nian, prekonseitu sira nian, ne'ebé la husik sira loke fuan no moris ba Maromak nia dezafiu sira. Ita-nia testu mak aikanoik daruak husi aikanoik tolu ne'e.

Ita bele komprende istória aikanoik nian hodi hatene situasaun sósiu-ekonómika Galileia nian iha Jezús nia tempu... Ema rai-na'in boboot sira moris iha sidade mak soi rai iha sira-nia liman. Sira uza sistema oioin atu esplora sira-nia rai; maibé forma ida esplorasau nian (esplorasau tanba rai-na'in manán produ tu maibé la serbisu) ne'ebé sira prefere liu mak aluga rai pedasuk ida, hodi troka ho parte boot ida husi produ tu rai nian. Ema sira ne'ebé aluga, baibain ema agrikultór/kamponés sira ne'ebé lakon sira nia rai tanba presau nian fiskál no produsaun ladi'ak. Agrikultór sira-ne'e moris iha situasaun perigu'inseguransa moris nian: sura tiha kolen no gastu hotu esplorasau nian, impostu sira ne'ebé tenke selu no entrega parte ne'ebé pertense ba rai-na'in, sira hetan uitoan de'it ne'ebé la to'o atu sustenta an rasik no família. Bainhira mai tinan sira ho agríkola aat, eskema ne'e signifika moris-mukit absoluta... Kuadru ne'e provoka atu mosu beibeik konfliktu sosiál sira no movimentu kamponés sira-nian ne'ebé luta konta rai-na'in eh kontra impostu aas.

Iha senáriu ida-ne'e mak Jezús koloka aikanoik ne'ebé ohin apresenta mai ita.

## *MENSAJEN*

Aikanoik ohin nian, nia pontudepartida hanesan ho aikanoik “to'os-uvás nian” iha Is 5,1-7: “ema” ida kuda “ai-uvás”, hale'u tiha ho lutu, nia ke'e fatin sama-uvás ida iha to'os laran no harii torre ida.

Hafoin, husi ne'e ba oin, Jezús nia aikanoik dook uitoan husi ida Isaías nian... Iha Jezús nia versaun, proprietáriu/to'os-uvás nia na'in la esplora direktamente “to'os-uvás”, maibé konfia ba “ema ne'ebé kuda to'os-uvás” ne'ebé tenke fó ba nia, tinan tinan, persentajen ida husi fuan ne'ebé prodú. Bainhira “na'in/proprietáriu” nia atan sira mosu atu foti parte ne'ebé pertense ba patraun, “serbisu-na'in to'os uvás nian” trata aat sira no oho sira; no bainhira “to'os-uvás” nia na'in haruka nia oan-mane rasik atu fó hanoin kona-ba sira-nia responsabilidade no respeito ba kompromisu sira, sira oho nia.

“To'os-uvás” ne'ebé Jezús ko'alia iha ne'e mak Israel – Maromak nia Povu. Na'in ba “to'os-uvás” mak Maromak. “Serbisu-na'in to'os-uvás nian” mak líder relijiozu judaiku sira – enkarregadu atu serbisu iha “to'os-uvás” no halo atu nia prodús fuan. “Atan sira” ne'ebé “na'in” haruka mak, evidentemente, profeta sira ne'ebé líder sira nasaun nian, dalabarak, persege, tuda fatuk ba sira no oho sira. “Oan-mane” ne'ebé mate “iha to'os-uvás nia li'ur” mak Jezús, ne'ebé ema oho iha muru sira Jerusalém nia li'ur.

“Serbisu-na'in to'os-uvás” nia hahalok aat tebes: sira la'ós la entrega de'it produ tu ne'ebé pertense ba to'os-uvás nia “na'in”, maibé taka dalan hotu diálogu nian no rekuza possibilidade hotu enkontru no entendimentu nian ho to'os-uvás nia “na'in”: sira trata aat no tuda mate ho fatuk atan sira ne'ebé to'os-uvás nia “na'in” haruka no oho tiha nia oan-mane.

Iha kuadru ne'e nia oin, Jezús interpela direktamente ninia ouvinte sira: “to'os na'in mai, nia sei halo sá loos ba serbisu-na'in to'os uvás nian?”

Komunidade sarani primitiva lalais atu hetan resposta ba kestaun ne'e. Iha perspetiva katekista dahuluk sira-nian, Maromak nia resposta ba Israel nia rekuza fó iha movimentu rua. Uluknanai, Maromak halo “oan-mane” ne'ebé ema sira serbisu iha to'os oho, moris hi'as, glorifika nia no halo nia sai “fatuk-inan” konstrusaun foun ida nian; daruak, Maromak deside hasai “to'os-uvás” husi “serbisu-na'in to'os uvás nian” aat no ingratu sira ne'e nia liman no

konfia ba “serbisu-na’in to’os uvas nian “ seluk – ba povu ida ne’ebé halo “to’os-uvas” prodús fuan di’ak no entrega ba “na’in” fuan sira ne’ebé ninia direitu nian.

Mateus la iha interese ba kestaun oan-mane nian – ne’ebé moris hi’as, foti sa’e iha glória no tau nu’udar fatuk-inan konstrusaun foun nian – maibé ba kestaun entrega “to’os-vas” ba povu seluk. Hodi subliña aspetu ne’e, Mateus iha finalidade rua...

Dahuluk, ho forma ne’e nia espika tanba sá mak iha maioria comunidade sarani sira, judeu sira – traballadór dahuluk sira Maromak nia “to’os-uvas nian – minoria de’it: sira lakohi oferese fuan di’ak ba “to’os-uvas” nia “na’in” no hakribi nafatin tentativa hotu “Na’in” nian iha sentidu aprosimasaun no kompromisu nian. Lojikamente, to’os nia “na’in” hili “serbisu-na’in to’os-uvas” seluk. Buat ne’ebé desizivu ba Maromak nia hilin, la’ós katak traballadór foun sira “to’os-uvas” nian ema judeu eh la’ós judeu; buat ne’ebé desizivu mak sira dispostu atu oferese ba “na’in” fuan sira ne’ebé ninian no simu “oan-mane” ne’ebé “na’in” haruka ba hasoru sira.

Daruak, Mateus ezorta ninia comunidade atu prodús fuan loos ne’ebé fó ksolok ba “to’os-uvas” nia “na’in”. Ita iha finál sék. I (dékada 80); sarani sira comunidade Mareus nian, lakon tiha ona entuziazmu inisiál no moris iha kristianizmu fasil, laho ezijénsia, laho kompromisu, instaladu. Katekista Mateus aproveita oportunidade atu ezorta maun no biin-alin sira comunidade nian atu hadeer, atu sai husi komodizmu, atu haka’as an, atu fó fuan sira Reinu nian, atu moris ho radikalidade Jezús nia proposta sira.